

[0297]

37. Nijfrysk *stintling*.

In net sa bikende fûgelnamme hat W. Dykstra by it neiswyljen noch yn syn wurdboek opnimme kinnen. It is it wurd *stintling*, in namme foar *Podiceps auritus* (L.), dy't to uzes almeast fan *túfdûker* of *túfkedûker* hjit.

Dy't de ôflieding fan *stintling* witte wol, sil nei it ôfsplissen fan it efterheaksel *-ling* bisykje moatte om de sibben fan it foarste wurdlied *stint-* to finen, en dat is net sa'n heikrewei. As selsstannich wurd bistie *stint* al yn it Angelsaksysk, ek in fûgelnamme, dy't him fuortset yn it nijjingske *stint* 'bûnte grill'. It opmerklike is nou, dat mei *stint* yn oare Germaenske kontreien net in fûgel, mar in lytse fisksoarte oantsjut wurdt. Sa is middelleechdútsk, nijheechdútsk, deensk en noarsk *stint*, krekt lyk as middelheechdútsk *stinz(e)* en nijheechdútsk *Stinz*, in bineaming foar de 'spjirring' (*Osmerus eperlanus*). Hingje dy beide wurden *stint*, de fûgel- en de fisknamme, meiinoar gear? De wurdboekskriuwers tinke fan àl, hja bringe *stint* tobek nei de germaenske foarm **stenta-*, dy't sels wer in útrinder fan 'e yndogermaenske wurdstamme **steu-* is. De oarspronklike bitsjutting fan **steu-* moat 'stjitte, slaen' en fan **stenta-* 'stomp, gnobsk' west ha. Sa't men bygelyks by Kluge, *Etym. Wb. der deutschen Sprache* neilêze kin, binne mei lûdwiksel fan 'e selde stamme ôflaet ags. *stunt* 'dom, ûnnoazel', mhd. *stunz* 'stomp, koart', âlder deensk *stunt* 'koart', deensk (dial.) *stutt* 'koart, noartsk'; âldnoarsk *stuttr* 'koart, ûnfreonlik'; âldsweedsk en weedsk (dial.) *stunter* 'koart'. Bûten it Germaensk binne dêr û.o. lat. *tundo* 'ik stjit, slaen' en sanskr. *tudāti* 'hy stjit' oan bisibbe. De ydg. stamme **steu-* hat yn 'e Germaenske talen tige wreide, forlykje foar it Frysk *stobbe*; *stûf*; *styf-* (yn: *styffaer*); *stik*, *stok*, *stûke*, *stûkje*; *stûpe*; *stjitte*. - Om nou wer op de túfdûker del to kommen: dy sil de namme *stintling* grif krige hawwe troch syn stomp efterlein, dat ek yn 'e wittenskiplike bineaming *podiceps* (fan *podex* = 'ears') in rol spilet en dat fierders de namme biskaet hat fan 'e *earsfuttel* (holl. *dodaars*), in ieldûker, dy't ta deselde famylje as de túfdûker of *stintling* heart.

W.J. Buma.